

**Parlimen: Nasib Wartawan Menjadi Perhatian Anggota Parlimen
Bernama
10 November, 2011**

KUALA LUMPUR, 10 Nov (Bernama) -- Keselesaan dan keperluan para wartawan dan jurukamera yang membuat liputan di bangunan Parlimen mendapat perhatian beberapa anggota Parlimen Khamis.

Datuk Dr Marcus Mojigoh (BN-Putatan) mencadangkan supaya satu reka bentuk ruang yang baik supaya petugas media boleh duduk dalam keadaan selesa dengan adanya sambungan plag elektrik yang mencukupi untuk menyambung bekalan bateri ke komputer riba mereka.

"Media kita sekarang ini berselerak di atas lantai untuk membuat liputan. Sepatutnya mereka perlu menyediakan meja untuk letak laptop, skrin besar dan plag supaya mereka selesa menjalankan tugas mereka.

"Mereka juga manusia, kena ada tempat duduk supaya mereka boleh tahu apa isu yang berlaku dan dibawa...kesian mereka duduk di lantai dan di tepi-tepi," katanya semasa perbahasan Rang Undang-undang Perbekalan 2012 peringkat jawatankuasa bagi Kementerian Kerja Raya di Dewan Rakyat Khamis.

Dr Marcus meminta agar pihak Jabatan Kerja Raya (JKR) mengambil perhatian segera bagi menangani situasi ini.

Datuk Halimah Mohd Sadique (BN-Tenggara) yang setuju dengan pendapat Dr Marcus berkata tumpuan perlu diberikan kepada rakan-rakan media dengan kadar segera.

"Tadi saya lalu di jambatan perantara antara bangunan lama dan baru, mereka duduk di sepanjang pinggiran itu tanpa kerusi...situasi yang sama juga kepada ketua-ketua jabatan yang duduk sementara menunggu giliran menteri-menteri mereka jawab soalan," katanya.

Beliau berharap pihak berkuasa memberi tumpuan kepada kesemua golongan sama ada kakitangan kerajaan ataupun para media yang datang ke Parlimen untuk melaksanakan tanggungjawab mereka.

Datuk Bung Moktar Radin (BN-Kinabatangan) juga berkata perkara ini merupakan satu pandangan yang baik dan amat dialu-alukan.

"Pegawai dan wartawan tidak boleh menjalankan kerjaya yang baik kalau tiada suasana yang selesa...saya berharap dewan yang baru itu akan ada satu lakaran yang baik untuk semua pihak," katanya.

Tinjauan mendapati nasib para wartawan dan jurukamera menjalankan tugas mereka di kawasan lobi Dewan Rakyat baru yang sempit sehingga terpaksa datang awal untuk merebut tempat duduk masing-masing.

Persidangan dewan bersambung Isnin.

---BERNAMA

Copyright © 2011 BERNAMA

Source: <http://www.bernama.com/bernama/v5/bm/newsindex.php?id=625950>